

# Vedtekter for Norsk Landbruksrådgiving Rogaland

Vedtatt på årsmøtet 20.03.2018

## §1 Verksemd

Norsk Landbruksrådgiving Rogaland er ei foreining med oppgåver retta mot landbruket med hovudkontor på Særheim og kontor i distrikta.

## §2 Formål

Formålet til Norsk Landbruksrådgiving Rogaland er å driva opplysning, rådgiving, utvikling, forsøksarbeid og servicetenester innanfor dei landbruksrelaterte fagfelt som medlemmene spør etter.

Norsk Landbruksrådgiving Rogaland skal bidra til å fremja det landbruksfaglege miljøet i distriktet.

## §3 Medlemskap

Alle enkeltpersonar eller næringsdrivande føretak som driv ei form for landbruksrelatert verksemd, kan bli medlemmer i Norsk Landbruksrådgiving Rogaland.

Privatpersonar, organisasjonar, kommunar, institusjonar eller andre kan gi støtte til Norsk Landbruksrådgiving Rogaland. Desse kan møta på medlemsmøte, men har ikkje stemmerett, og kan ikkje veljast inn i styret.

Medlemmer blir tekne opp ved innmelding til Norsk Landbruksrådgiving Rogaland. Ved innmelding blir det gitt skriftleg erklæring om at dei er kjende med rettar og plikter som følgjer medlemskapet.

Alle medlemmer pliktar å betala kontingent som vert fastsett for det enkelte år.

Medlemskapet følgjer kalenderåret. Utmelding må skje skriftleg innan utgangen av september for å ha verknad frå 1. januar det påfølgjande år.

Medlemmer som ikkje betaler kontingent, kan av styret strykast som medlem etter skriftleg varsel, og alle plikter og rettar stansar.

## §4 Medlemmen sine rettar og plikter

Medlemmene har rett til å få råd og rettleiing av ulike slag.

Styret fastset kva tenester som inngår i serviceavgifta, kva som inngår i tilleggskontingentar, og kva som er betalingstenester.

Medlemmene kan fremja ønske om oppgåver, aktivitetar og forsøk i Norsk Landbruksrådgiving Rogaland.

Medlemmene pliktar å betale kontingenten innan fastsett tid.

## §5 Arbeidsmåte

Arbeidet i Norsk Landbruksrådgiving Rogaland blir utført ved hjelp av tilsett personell, leigd hjelp eller på annan måte. For å oppfylle formålet, er det nødvendig at Norsk Landbruksrådgiving Rogaland har eit godt samarbeid med andre relevante organisasjonar og institusjonar knytt til landbruket.

## §6 Finansiering

Finansiering av Norsk Landbruksrådgiving Rogaland skjer ved medlemskontingent, tilskotsordningar, støtte frå kommunar og andre, prosjektinntekter og inntekter frå kurs og sal av tenester til medlemmer eller andre.

Medlemskontingenten består av ei serviceavgift og ein produksjonsavhengig tilleggskontingent som begge blir lagt fram for årsmøtet.

Generelle tenester vert tilbydde innanfor den årlege kontingenten, medan tenester som bare kjem nokre, eller ei gruppe medlemmer til gode, skal fakturerast særskilt.

## §7 Styret

Norsk Landbruksrådgiving Rogaland vert leia av eit styre på inntil 7 medlemmer. Dei tilsette har rett til å vera representerte med ein person i styret, vald av og blant dei tilsette. Styremedlemmen med varamedlem vald av og blant dei tilsette trer inn i styret etter ordinært årsmøte.

Styremedlemmene skal veljast for to år. Leiar skal veljast for eitt år. Val av leiar og styremedlemmer skal skje skriftleg. Årsmøtet vel kvart år 3 varamedlemmer i nummerert rekkefølgje. Styret vel sjølv nestleiar.

Styret held styremøte så ofte styreleiar finn det nødvendig, eller når to styremedlemmer krev det. Sakene blir avgjorde når det er fleirtal av det valde styret. Diskusjonane skal protokollførast.

Norsk Landbruksrådgiving Rogaland er forplikta ved underskrift av styreleiar og dagleg leiar i fellesskap.

Styret vel utsendingar til årsmøte sentralt.

Styret kan meddela prokura.

## §8 Styrets oppgåver og plikter

Styret tilset dagleg leiar og avtaler løn og utarbeider instruks for denne. Lønning av tilsette skjer i samsvar med gjeldande avtale om løns- og arbeidsvilkår. Styret er dagleg leiar sin næraste overordna. Dagleg leiar er dei andre tilsette sin næraste overordna.

Styret leiar verksemda i Norsk Landbruksrådgiving Rogaland i samråd med dagleg leiar. Styret skal leia Norsk Landbruksrådgiving Rogaland i samsvar med vedtekter og årsmøtevedtak, og forvalta organisasjonen sine midlar. Styret skal kvart år leggja fram årsmelding og revidert rekneskap for siste driftsår, budsjett og arbeidsplan for inneverande år.

Styret i Norsk Landbruksrådgiving Rogaland har rett til å avgjera om medlemsoversikten kan bli frigitt, og i så fall til kven. Opplysningar som gjeld ein enkel medlem, kan ikkje bli frigitt av rådgivingsorganisasjonen utan etter godkjenning frå medlemmen sjølv.

## §9. Valnemnd

Valnemnda består av 5 medlemmer med personlege varamedlemmer.

Ein medlem frå kommunane Bjerkreim, Sokndal, Lund, Eigersund

Ein medlem frå kommunane Hå, Time, Klepp, Gjesdal, Sandnes, Sola, Stavanger.

Ein medlem frå Randaberg, Kvitsøy, Rennesøy, Finnøy, Hjelmeland, Strand og Forsand.

Ein frå kommunane Sveio, Haugesund, Utsira, Karmøy, Tysvær, Bokn, Vindafjord og Etne.

Ein frå kommunane Sauda og Suldal

Medlemmer av valnemnda og personlege varamedlemmer blir valde av årsmøtet for 3 år.

Leiar blir vald på årsmøtet. Valnemnda vel sjølv nestleiar. Årsmøtet bestemmer instruks for valnemnda.

## **§10. Medlemsmøte**

Medlemsmøte skal gjennomførast i kvar region før årsmøtet, både ordinære og ekstraordinære. Minst ein frå styret og ein tilsett legg fram forhold ved drifta, diskuterer og tar med seg synspunkt på arbeidet tilbake til styret.

Medlemsmøtet vel sine utsendingar til årsmøtet med varautsending for to år. Kvar region vel ein utsending pr. 150 påbegynte medlemmer.

Avdelingane er inndelte slik:

Avdeling 1 : Bjerkreim, Sokndal, Lund, Eigersund

Avdeling 2: Hå, Time, Klepp, Gjesdal, Sandnes, Sola, Stavanger, Randaberg, Kvitsøy, Rennesøy, Finnøy, Hjelmeland, Strand, Forsand

Avdeling 3: Sveio, Haugesund, Utsira, Karmøy, Tysvær, Bokn, Vindafjord, Etne

Avdeling 4: Sauda og Suldal

Kvart medlemsbruk har ei stemme, som kan nyttast ved personleg frammøte.

Ved likt tal på stemmer, avgjer ein ved loddtrekning.

Det skal førast protokoll frå medlemsmøta.

## **§11 Årsmøte**

Årsmøtet består av styret i NLR Rogaland og valde årsmøteutsendingar

Styret skal kalla saman ordinært årsmøte som vert avvikla før 1. mai. Innkalling med saksliste til årsmøtet skal skje skriftleg såframt ikkje anna tilfredsstillande innkalling vert nytta, og med minst 14 dagars varsel.

Årsmøte skal leiast av den valde årsmøteleiaren. Årsmøteleiaren har ikkje stemmerett.

Årsmøtet skal:

1. Godkjenna innkalling og saksliste.
2. Velja referent og to personar til å underskriva protokollen.
3. Behandla årsmelding og revidert rekneskap.
4. Få framlagt styret sitt budsjett og arbeidsplan, kontingent og prisar på tenester for inneverande år.
5. Behandla innkomne saker. Desse må vera styret i hende innan 31. januar.

6. Gjennomføra val:

- a leiar for eitt år
- b styremedlemmer for to år
- c tre varamedlemmer i nummerrekkefølge for eitt år
- d val av revisor
- e val av medlemmer i valnemnda for tre år
- f val av leiar av valnemnda blant medlemmene av nemnda
- g val av personlege varamedlemmer for nyvalde medlemmer av valnemnda
- h val av møteleiar med vara møteleiar for eitt år til årsmøtet neste år

Val på leiar og styremedlemmer skal vera skriftleg.

7. Fastsetja godtgjersla til tillitsvalde etter tilråding frå valnemnda.

Årsmøtet bestemmer instruks for valnemnda.

Ved avstemming har kvar årsmøteutsending ei stemme som kan nyttast ved personleg frammøte. Styret har ikkje stemmerett i behandling av årsmelding og revidert rekneskap. Stemmerett i årsmøtet føreset at kontingenten for siste året er betalt.

Når ikkje anna er bestemt, blir sakene avgjorde med fleirtall av dei godkjende stemmene som er gitt. Ved like mange stemmer ved val blir valet avgjort ved loddtrekning.

Ekstraordinært årsmøte skal haldast dersom styret meiner det er nødvendig, eller dersom minst 1/3 av medlemmene krev det.

## **§12 Tvistar**

Alle tvistar mellom Norsk Landbruksrådgiving Rogaland og medlemmer skal først verta søkt løyst minneleg. Tvist som ikkje blir løyst på minneleg vis, vert avgjort ved ordinær domstolsbehandling, med mindre partane er samde om å løysa tvisten ved voldgift i samsvar med gjeldande lov om voldgift.

## **§13 Vedtektsendring**

Forslag om endringar av vedtektene må vere sende styret innan 31. januar. Gyldig vedtak på årsmøtet krev tilslutning frå minst 2/3 av dei frammøtte sine stemmer.

Endring av vedtekt § 13 krev ¾-fleirtal.

Forslag til vedtektsendring skal sendast ut saman med innkallinga seinast 14 dagar før årsmøte.

## **§14 Samanslåing**

Forslag om samanslåing med ein annan organisasjon skal fremjast av styret. Saka blir teken opp på fyrste årsmøte og må gjerast kjent i innkallinga. Gyldig vedtak om samanslåing krev minst 2/3 fleirtal av dei frammøtte. Dersom det ikkje vert oppnådd tilstrekkeleg fleirtal, reknast vedtaket om samanslutning for avvist.

Årsmøtet avgjer i tilfelle samanslutning korleis organisasjonen sine midlar skal nyttast.

## **§ 15 Oppløysing**

Forslag om oppløysing kan fremjast av styret.

Vedtak om oppløysing krev 3/4 fleirtal av dei stemmene som er gitt, i to påfølgjande årsmøte.

Det siste årsmøtet som vedtar oppløysing, skal også velja eit avviklingsstyre.

Etter at alle økonomiske forpliktingar er dekkja, skal eventuell resterande formue etter vedtak av årsmøtet, stå på konto i inntil fem år for det tilfellet at ny organisasjon av same art og liknande formål blir danna, og midlane overdragast denne.

Årsmøtet fattar vedtak om korleis organisasjonen sine midlar skal nyttast dersom ny organisasjon ikkje er danna innan fem år.

Disponering av utstyr det er gitt mekaniseringstilskot til, skal diskuterast med Norsk Landbruksrådgiving

Vedtak om oppløysing skal meldast Norsk Landbruksrådgiving.